

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

- लोकसभा चुनावें दे पैहले दऊं चरणें लेई चुनावें प्रचार अभियान होर तेज होई गेआ ऐ। बक्ख-बक्ख सियासी पार्टिं दे प्रमुख नेता रैलियां ते रोड शो करै करदे न। प्रधानमंत्री नरेन्द्र मोदी होर 12 अप्रैल गी उधमपुर च जिसलै के कांग्रेस नेता राहुल गांधी होर ईद दे बाद जम्मू च रैली करगंन।
- दुए गेड़ दे लोकसभा चुनावें लेई नामांकन वापस लैते दा अज्ज खीरी ध्याड़ा ऐ।
- चुनावें आयोग नै लोकसभा चुनावें च युवाएं ते शैहरी मतदाताएं दी शमूलियत बधाने लेई सोशल मीडिया पर केई नमें ते अनोखे अभियान रंभे न।
- रक्षा प्रमुख सीडीएस जनरल अनिल चौहान होर सेना दे त्रौनें अंगें बश्कार बेहतर तालमेल लेई अज्ज "परिवर्तन चिंतन" नां दे सांझे सम्मेलन दी अध्यक्षता करगंन।

<><><><><><>

## Campaign

बक्ख-बक्ख सियासी पार्टिं दे बड्डे लीडर मुख्खें दे केइएँ हिस्सें च लोकसभा चुनावें च अपने अपने मेदवारें दे हक्कै च समर्थन करने लेई रैलियां करा'रदे न। भारती जनता पार्टी दे वरिष्ठ लीडर ते प्रधानमंत्री नरेन्द्र मोदी होर 12 अप्रैल गी जम्मू कश्मीर दे उधमपुर जिले च जिसलै के उत्तर प्रदेश दे मुख्खमंत्री योगी आदित्यनाथ होर 10 अप्रैल गी कठुआ जिले च चुनावी रैली करगंन। दूई बक्ख कांग्रेस पार्टी दे वरिष्ठ नेता राहुल गांधी ते प्रियंका गांधी होर अपने मेदवारें दे समर्थन च ईद दे बाद जम्मू च रैलिं गी संबोधत करगंन। मेद ऐ जे कांग्रेस पार्टी दे बड्डे नेता अगले हफ्ते प्रदेश दे दौरे पर आँगन। उधमपुर लोकसभा सीट लेई पैहले गेड़ तैहत 19 अप्रैल गी जम्मू संसदी सीट लेई दुए गेड़ तैहत 26 अप्रैल गी मतदान करोआया जाग। बीजेपी नै दऊं बारी दे सांसद ते केन्द्री मंत्री डॉ. जितेन्द्र सिंह होरें गी उधमपुर सीट लेई चुनावें मैदान च तोआरे दा ऐ। दूई बक्खी कांग्रेस नै बी चौधरी लाल सिंह होरें गी इस सीट लेई अपना मेदवार बनाए दा ऐ। तोआई जम्मू लोकसभा सीट लेई बीजेपी नै मजूदा सांसद जुगल किशोर शर्मा होरें गी जिसलै क कांग्रेस नै रमण भल्ला होरें गी चुनावें मैदान च तोआरे दा ऐ।

<><><><><><>

## Lok Sabha

लोकसभा चुनावं दे दुए गेड़ दे मतदान लेई दाखल नामजगिएं गी वापस लैने दा अज्ज खीरी ध्याड़ा ऐ। जम्मू कश्मीर च इस गेड़ तैहत जम्मू-सांबा-रियासी लोक सभा सीट लेई 26 अप्रैल गी वोट पोआए जाने न। इस गेड़ लेई दाखल नामजदगिएं दे कागतें पत्रे दी जांच 8 अप्रैल गी कीती गई ही जेहदे च त्रऊं दी नामजदगी खारज होने दे बाद एल्लै कुल 23 मेदवारें गै चुनावं मैदान च न।

<><><><><><>

## ECI-Social

चुनां आयोग नै औंदे लोकसभा चुनावं च युवा ते शैहरी मतदाताएं दी हिस्सेदारी बधाने आस्तै सोशल मीडिया पर केई पैहले ते अभियाने दी शुरूआत कीती ऐ। आयोग मतदाताएं तगर अपना सनेहा पजाने आस्तै टर्निंग -18 ते You are the one अभियान राएं आर्कश विशे लोकप्रिय आइकन ते सरबंधी सामग्री दा इस्तेमाल करा'रदा ऐ तां जे औंदे चुनावं च युवा ते शैहरी मतदाताएं दी गिनतरी च बाद्धा कीता जाई सकै। You are the one नां दे अभियानद । मकसद चुनावी प्रक्रिया च शामिल बक्ख-बक्ख पक्खे दे बेशकीमती योगदान गी पंछानना ते ओहृदा जश्न मनाना ऐ। चुनावं आयोग नै चुनावी प्रक्रिया बारे फर्जी खबरें ते गलत सूचनाएं-जानकारी पर रोक लाने लेई बी इक विशेष अभियान शुरू कीते दा ऐ।

<><><><><><>

## Mehbooba Polls

पीपल्स डेमोक्रेटिक पार्टी पीडीपी दियां प्रधान महबूबा मुफ्ती होरें अनंतनाग-राजौरी लोकसभा सीट पर चुनावं लड़गंन। महबूबा हुंदा मुख् मकाबला साबका मुख्मन्त्री ते डेमोक्रेटिक प्रोग्रेसिव अजाद पार्टी दे प्रधान गुलाम नबी आजाद, नैशनल कांफ्रेंस दे रसूखदार गुज्जर नेता मियां अल्ताफ अहमद ते अपनी पार्टी दे पहाड़ी नेता जफर इकबाल मन्हास कन्नै ऐ। उआं बीजेपी नै अजे तोड़ी इस सीट पर अपना कोई मेदवार खड़ा नेई कीता ऐ। पीडीपी दे संसदीय बोर्ड दे अध्यक्ष सरताज मदनी होरें कल कश्मीर घाटी दिएं त्रऊं सीटे लेई अपने मेदवारें दे नाएं दा ऐलान कीता। पार्टी दे "यूथ विंग" दे अध्यक्ष वहीद परा श्रीनगर हल्के थमां ते साबका राज्यसभा मिंबर फयाज मीर बारामुला लोकसभा हल्के थमां मैदान च तोआरे गे न।

<><><><><><>

## Drug Hot Spot

पुलसै आक्खेआ ऐ जे जम्मू च ऐसी 14एं थाहरें दी शिनाख्त कीती गई ऐ जित्थें नशीले पदार्थें दा मता गैर कनूनी कारोबार होंदा ऐ। पुलसै शैहरा च नशे दी कबैतु कन्नै निबड़ने लेई कीते जा'रदे बक्ख-बक्ख जतनें पर बी लोह पाई ऐं जम्मू दे एसएसपी विनोद कुमार होरें दस्सेआ ऐ जे इस ब'रे असें तोड़ी एनडीपीएस दे 71 मामलें दर्ज कीते गेदे न ते 85 जस्करें गी गिरफ्तार कीता गेदा ऐ। उनें दस्सेआ जे पिछले त्रऊं म्हीने दरान पीआईटी-एनडीपीएस कनून तैह्त 13 बदनाम तस्करें खलाफ मामले दर्ज कीते न जदके पिछले ब8रे एह गिनमरी 24 ही।

<><><><><><>

## NCERT-Copyright

शैक्षणिक शोध ते सिख्लाई सरबंधी राश्ट्री काउंसल एनसीईआरटी नै अपने शैक्षणिक समग्री दी कॉपी राईट उल्लंघना दे मामले च चेतावनी जारी कीती ऐ। चेतावनी च आक्खेआ गेआ ऐ जेकर कोई बी व्यक्ति जां संस्था कॉपीराईट इजाजत दे बगैर एनसीईआरटी दी कताबें दी समग्री दा बवसायिक इस्तेमाल लेई प्रकाशन करदे न तां उंदे खलाफ कनूनी कारवाई कीती जाग। एनसीईआरटी नै लोकें गी ऐसी कताबें दा इस्तेमाल नेई करने दी गुजारश कीती ऐ ते आक्खेआ ऐ जे उंदे च दित्ती गेदी समग्री तत्थें दे आधार पर गलत होइ सकदी ऐ। इब्बी सलाह दित्ती गई जेकर कुसै व्यक्ति गी ऐसी पायरेटेड कताबां थ्हांदियां न तां एनसीईआरटी गी ईमेल [pd.ncert.nic.in](mailto:pd.ncert.nic.in) दे राएं तुरत एहदी जानकारी दित्ती जा।

<><><><><><>

## NCC Cadets

सरकारी गांधी मैमोरियल साईंस कालेज जम्मू आस्सेआ कल एनसीसी दे नमें ते पराने दौनें चाल्ली दे कैडेटें लेई सुआगत ते विदेयाई पार्टी दा सरिस्ता कीता गेआ। इस कार्यक्रम च एनसीसी ग्रुप जम्मू दे ग्रुप कमांडर ब्रिगेडियर जी.एस.चीमा मुख् परौहने हेजिनें पिछले इक ब'रे दरान इनें केडटें दे कम्म ते कारवाइएंग-गतिविधिएं दी सराहना कीती। उनें केडटें गी आक्खेआ जे ओ आइंदा बी अपनी पूरी निष्ठा तनदेही ते जब्बे कन्ने कम्म करन ते एनसीसी आस्सेआ हर नमीं पेशकश आले मौके दा पूरा-पूरा फायदा ठोआंदे होई ओहदा हिससा बनन ते इक बेहतर, कुशल ते जिम्मेदार नागरिक बनन। उनें नमें केडटें दा बी एनसीसी च सुआगत कीता।

<><><><><><>

## Parivartan Chintan

सेना दे त्रौनें अंगें दा इक रोजा सांझा सम्मेलन संगारें नमीं दिल्ली च लग्गोग। परिवर्तन चिंतन नां दे इस सम्मेलन दा मकसद नमें विचारें, नमिएं पैहलें ते सुधारें पर जोर देना ऐ, तां जे फौज दे त्रौनें सीगें बश्कार नेडमा ते बेहतर तालमेल बघाया जाई सकै। सम्मेलन दी अध्यक्षता रक्षा प्रमुख सी.डी.एस. जनरल अनिल चौहान होर करेन। एह फौज दे त्रौनें अंगें दे प्रमुखें, सैन्य कार्य विभाग ते इंटीग्रेटिड डिफेंस स्टाफ दे मुख्यालयें दा पैहला सांझा सममेलन होग।

<><><><><><><><>

## Samba Amavasya

देसै दे होरनें हिस्सें आला लेखा प्रदेश दे सांबा जिले च बी अज्ज सोमवारी मस्सेया मनाई जा'रदी ऐ। जिले दिएं ऐतिहासक ते धार्मिक थाहरें पुरमंडल ते उत्तरबैहणी च श्रद्धालुएं दा भारी रश ऐ। श्रद्धालु पवित्तर देवका नदी दा श्नान करियै शिव मंदर च मत्था बी टेका करदे न। इस बारे मती जानकारी देआ करदे न साढ़े सांबा संवाददाता.....

<><><><><><><><>

## Swachhata

दूर दरेड़े पहाड़ी इलाकें च रौहने आले लोकें च स्वच्छता दे बारे च जागयकता पैदा करने लेई फौज आस्सेआ नैली च कंडेयाल कोट ग्रां ते बेहराम गला सरकारी हाई स्कूल च इक कार्यक्रम दा सरिस्ता कीता गेआ। इस मौके लोकें गी अपने शरीर दी निजी स्वच्छता, घरें च ते आंड गोआंड आले दुआले स्वच्छता दे महत्व बारे जागरूक कीता गेआ। एहदे अलावा उनेंगी कोई सेहत लेई स्वच्छ जीवन शैली ते खानपान दे महत्व बारे बी जानकारी दिक्ती गई।

<><><><><><><><>

## SVEEP-Gool

मतदाताएं गी चुनां ते वोट पाने दे महत्व बारे जागरूक ते प्रेरत करने दे मकसद कन्नै स्वीप अभियान तैहत गूल दे सरकारी मॉडल हायर सकेँडरी स्कूल च इक कार्यक्रम लोआया गेआ जेहदे च विद्यार्थिएं ते टकोहदा करियै पैहली बारी वोट पाने आलिएं बच्चिएं गी देश दे भविक्ख निर्माण च वोट पाइयै योगदान देने लेई प्रेरत कीता गेआ।

<><><><><><>

## Highway

जम्मू श्रीनगर राष्ट्रीय जरनैली शिड़क रामबन जिले च खूनी नाला इलाके च पस्सियां पौने कारण गडिडएं दी आओजाई लेई बंद ऐ। ट्रैफिक पुलस नै लोकें लेई सलाह तारी कीती ऐ जे ओ रस्ता साफ होने तगर राष्ट्रीय जरनैली शिड़क एनएच-44 पर सफर नेई करन।

<><><><><><>

## Mugal

जम्मू प्रांतै दे राजौरी-पुंछ जिले गी कश्मीर घाटी दे शोपिया जिले कन्नै जोड़ने आली मुगल रोड लगभग 70 दिनें तोड़ी बंद रौहने दे बाद गडिडएं दी आओजाई लेई खोली दित्ती गई ऐ। पुंछ दे जिला कवकास कमीशनर यासीन मोहम्मद चौधरी हुंदे आस्सेआ जारी इक हुकमै च आक्खेआ गेआ ऐ जे इस सड़के पर 19 किलोमीटर मील पत्थर डोगगरियां कोला लेइयै 43 किलोमीटर पीर की गली तगर सड़कै परा बर्फ ते पस्सिएं दा मलबा हटाने दा कम्म मुकम्मल करी लैता गेदा ऐ। जेहदी जानकारी मुगल रोड विंग दे चीफ इंजीनियर ते राजौरी पुंछ मकैनिकल डिवीजन दे एक्सी.एन हुंदे आस्सेआ उपलब्ध कराई गई ऐ। जेहदे मूजब 8 अप्रैल कोला बफालिआज थमां पीर की गली लेई गडिडएं दी इक तरफा आओजाई दी खुल्ल दित्ती गेदी ऐ।

<><><><><><>

## IPL

आईपीएल क्रिकेट च कल रातीं लखनऊ दे अटल बिहारी वाजपेयी स्टेडियम च खेड्डे गेदे मैच च लखनऊ सुपर जायंटस नै गुजरात टाइटंस गी 33 रंजें कन्नै हराई दित्ता। 154 रंज दे लक्ष्य दा पिच्छा करदे होई गुजरात टाइटंस दी टीम 18 ओवर ते 5 गेंदें च 130 रंज बनाई सकी। ओहदे सारे खडारी आउट होई गे।

अज्ज चिन्नेई दे एम.ए.चिंदबरम स्टेडियम च चिन्नेई सुपर किंग्स दा मकाबला कोलकाता नाईट्स राईडर कन्ने  
होग। एह मैच संजा साढे 7 बजे शुरू होग।

<><><><><><>